

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqqullugu
(Inatsisartuni ilaasortaq Anthon Frederiksen, Partii Naleraq)

Akissuteqaat

(Ineqarnermut, Sanaartornermut Attaveqaqatigiinnermullu Naalakkersuisoq)

Siullermeerneqarnera

Siunnersuummut, atorfilinnut sulisunut inissiani najugaqarnissamut pisinnaatitaaffeqartunut iluaqutsiisussamut, taamaalillunilu sulisut inissianik attartortittakkanik nalinginnaasunik ajornannginnerusumik pissarsisinnaalernerinik kinguneqartussamut Naalakkersuisut qujapput. Pingaartumik kommunini aamma Namminersorlutik Oqartussani atorfillit sulisunut inissianik pissarsisinnaapput.

Sulisut sulisunut inissianik pissarsisinnaasut nalinginnaasumik qaammammusiaqarput, aammalu qaammammut aalajangersimasunik isertitaqartarlutik. Taakku saniatigut sulisut taakku utaqqisut allattorsimaffii nalinginnaasut avaqqullugit pisortat inissiaataannik attartortittakkamik pissarsisinnaapput.

Innuttaasut allat, atorfininnerminni sulisunut inissianik pissarsinissamut periarfissaqanngitsut inissianut attartortittakkanut nalinginnaasunut allatsinnissamut innersuunneqartarput. Inissiamut attartortittakkamut nalinginnaasumut utaqqisarneq sumiiffimmiit sumiiffimmut allanngorartorujussuuvoq. Tassalu A/S Inissiaatileqatigiiffik INI-mit ilisimatitsissutigineqarpoq, inissiamut attartortittakkamut nalinginnaasumut utaqqisarneq Qaqortumi ukiunik 1,7-inik, Nuummi ukiunik 6,9-nik, Sisimiuni ukiunik 2,1-inik aammalu Ilulissani ukiunik 3,7-inik sivisussuseqartarpoq.

Atorfillit sulisunut inissiani najugaqartut innuttaasutulli allatut inissiamut attartortittakkamut nalinginnaasumut utaqqisut allattorsimaffiannut allatsissinnaapput. Sumiiffinni inissiamik utaqqisarnerup sivikiffiini atorfilik ukiut arfineq marluk pineqartut qaangiutsinnagit inissiamik neqeroorfigineqartarpoq. Taamaalilluni atorfillip ukiut arfineq marluk qaangiutsinnagit sulisunut inissiaq najukkani inissiamut attartortittakkamut nalinginnaasumut allanngortissinnaavaa.

Piffissaq sulisunut inissiap inissiamut attartortittakkamut nalinginnaasumut allanngortinneqarsinnaaffia inissiamik nalinginnaasumik utaqqisarnermut sanilliullugu isigineqassaaq. Assigiinngissut annertuallaarpat, tamanna innuttaasut ilaannut allanut, inissiamik attartortittakkamik nalinginnaasumik neqeroorfigineqanngitsunut eqquiffiusumik immikkut pinninnerusutut isigineqassaaq. Inuit sulisunut inissiamik pissarsisinnaanngitsut tamanna naapertuutinnngitsutut isumaqarfigissavaat. Taamaattumik piffissaq inissiamut nalinginnaasumut utaqqisarnermut sanilliullugu isigineqassaaq.

Partii Naleqqap pingaartumik pisortani atorfillit, illoqarfinni pisortat inissiaataannik attartortittakkanik sivilisuumik utaqqiffiusartuni najugaqartut immikkut iluaqutserneqarnissaannik kissaateqartoq Naalakkersuisut maluginiarpaat.

Siunnersuut attartortitsisarneq pillugu peqqussutip ataatsimut iluarsanneqarnissaanut ilaatinneqarnissaa anguniarneqassasoq, taamaalillunilu immikkoortup taassuma kisimi allangortinneqarnissaannik immikkut allannguutissatut siunnersuuteqartoqassanngitsoq, Naalakkersuisunit siunnersuutigineqassaaq.

Tamanna tunngavigalugu immikkoortoq itigartinneqassasoq Naalakkersuisunit inassutigineqarpoq.